



Z A P I S N I K

25. sjednice Komisije za vanjsku trgovinu i carine Predstavničkog doma
Parlamentarne skupštine Bosne i Hercegovine,
održane 22.9.2008.godine

Sjednica počela u 12 sati.

Sjednici je predsjedavao prvi zamjenik predsjedavajuće Komisije Mehmed Suljkanović.

Sjednici su prisustvovali članovi Komisije: Slavko Jovičić, Jerko Ivanković Lijanović, Salko Sokolović, Hadži Jovan Mitrović i Ekrem Ajanović.

Odsustvo su opravdali: Snježana Rajilić, Jozo Križanović i Šemsudin Mehmedović.

Sjednici su prisustvovali: Emira Češljarić, sekretar Komisije, i Radomir Marjanović, stručni savjetnik u Komisiji.

Za sjednicu Komisije predložen je i jednoglasno usvojen sljedeći

D N E V N I R E D

1. Usvajanje Zapisnika 24. sjednice Komisije,
2. Dogovor o zauzimanju stava Komisije povodom zaključaka sa 24. sjednice u vezi s obavljanjem razgovora, zakazanog 23.9.2008., s članovima Kolegija Predstavničkog doma i predstavnicima resornih ministarstava (tema: Prijedlog zakona o zaštiti domaće proizvodnje, predlagač: Jerko Ivanković Lijanović),
3. Tekuća pitanja.

Ad.1.

Usvajanje Zapisnika 24. sjednice Komisije

Zapisnik 24. sjednice Komisije usvojen je jednoglasno, bez primjedbi.

Ad.2.

Dogovor o zauzimanju stava Komisije povodom zaključaka 24. sjednice u vezi s obavljanjem razgovora, zakazanog 23.9.2008., s članovima Kolegija Predstavničkog doma i predstavnicima resornih ministarstava (tema: Prijedlog zakona o zaštiti domaće proizvodnje, predlagač: Jerko Ivanković Lijanović).

Predsjedavajući Mehmed Suljkanović podsjetio je na hronologiju razmatranja Prijedloga zakona o zaštiti domaće proizvodnje, predlagača Jerka Ivankovića Lijanovića.

U diskusiji su učestvovali: Slavko Jovičić, Jerko Ivanković Lijanović, Mehmed Suljkanović, Hadži Jovan Mitrović, Ekrem Ajanović i Salko Sokolović.

Slavko Jovičić predložio je tematsku sjednicu oba doma po ovom pitanju (cjelokupna privreda, a ne samo poljoprivreda). Na tom sastanku neko mora dati odgovor na pitanje - šta je BiH donio Sporazum CEFTA. Održavanje tematske sjednice podržao je i Hadži Jovan Mitrović.

Mehmed Suljkanović predložio je da se zatraži od nadležnog ministarstva da ovo pitanje i problem riješi i regulira svojom odlukom što brže i efikasnije, ako već ne može u okviru zakona, s čim se nije složio Hadži Jovan Mitrović. On smatra da je bolje zakonom riješiti ovo pitanje u cjelini, a ne selektivnim donošenjem odluka.

Predlagač zakona **Jerko Ivanković Lijanović** rekao je da se odriče prava predlaganja ukoliko neko drugi prihvati da bude predlagač, što bi učinio iz ličnih razloga. U protivnom, insistirat će da se Zakon usvoji radi poljoprivrednih proizvođača i proizvodnje Bosne i Hercegovine koja se bez ovog zakona uništava. Komisija je pokušala kroz carinsku tarifu (što je djelimično riješila Evropska unija kroz Sporazum o stabilizaciji i pridruživanju s EU), a akcizama se za sada ne može ništa učiniti. Zaštita domaće proizvodnje jedino je područje djelovanja Komisije, ali do sada ništa nije urađeno.

Ekrem Ajanović predložio je da Komisija insistira kod Ministarstva vanjske trgovine i ekonomskih odnosa BiH da u najkraćem roku predloži zakon kojim će regulirati navedenu materiju.

Salko Sokolović rekao je da je, s obzirom na konstataciju da je stupanjem na snagu Sporazuma CEFTA i Sporazuma o stabilizaciji i pridruživanju došlo do pogoršanja i poremećaja domaće proizvodnje i u oblasti poljoprivrede i u privredi, potrebno zatražiti od Vijeća ministara BiH realizaciju zaključaka Predstavničkog doma o analizi učinaka u primjeni navedenih sporazuma na vanjskotrgovinski bilans BiH.

Predsjedavajući Mehmed Suljkanović na kraju rasprave predložio je:

S obzirom na to da nije bilo suprotstavljenih stavova i da su svi diskutanti saglasni s potrebom zaštite domaće proizvodnje, što se radi svugdje u svijetu, a mi ne želimo biti saučesnici u posmatranju propasti poljoprivredne proizvodnje, na sastanku koji će biti održan 23.9.2008., u 11 sati, Komisija će zatražiti da se ova oblast regulira zakonom bez namjere da određuje predlagača. Na sastanku treba predložiti da se u zakonskim okvirima, što nije u suprotnosti sa međunarodnim ugovorima, riješi zaštita kompletne privredne pa i poljoprivredne proizvodnje. Ovaj prijedlog jednoglasno je usvojen.

Ad.3.

Tekuća pitanja

Sekretar Komisije Emira Češljarić informirala je prisutne o urgencije Evropskoj komisiji (n/r Emila Okanovića), od 2.9.2008., radi dostavljanja mišljenja na **Prijedlog zakona o zaštiti domaće proizvodnje u okviru Sporazuma CEFTA**, predlagača Jerka Ivankovića Lijanovića, po zaključku s 22. sjednice Komisije. U telefonskom razgovoru Emil Okanović, 9.9. 2008., saopćio je sljedeće:

Iako je u razgovoru s članovima Komisije, obavljenom 22.7.2008., obećao da će dostaviti mišljenje, nakon konsultacija s pretpostavljenim u Briselu, rečeno je da se ne šalje pismeno mišljenje. EK u okviru svoje nadležnosti nije zadužena za provođenje Sporazuma CEFTA. Zato su nadležne potkomisije i komiteti, kako stoji u odredbama Sporazuma, a EK angažira se i može djelovati kod unapređenja trgovinskih odnosa, a kroz carinske stope u okviru odredbi i pravila EU.

Način zaštite domaće proizvodnje od prekomjernog uvoza kroz član 23bis Sporazuma može se regulirati u bilateralnim odnosima sa zemljama potpisnicama Sporazuma CEFTA. Prije sedam dana o navedenom je telefonom upoznat Jerko Ivanković Lijanović.

Sjednica je završena u 13,30 sati.

Sekretar Komisije
Emira Češljarić

Prvi zamjenik predsjedavajuće Komisije
Mehmed Suljkanović